

奉化縣志卷二十三

人物傳一

漢

黃公忠義黃賢人潔己避秦入商嶺深山高帝卽祚不能一致惠帝恭

讓出則濟難與東園公綺里季角里先生稱四皓潛光隱耀世嘉

其高墓在慈谿大隱山參用漢書張良傳注後漢書王貢傳序鄭元傳三國志虞翻傳注引會稽典錄及歷

志

案黃公姓氏里居諸說紛歧不足究詰虞翻傳注引典錄曰

鄞大里黃公漢之鄞今之奉化是公爲奉化人無疑大里據

鄞志謂卽黃公林吾邑舊志謂忠義鄉黃賢村卽其地其說

互異然漢時黃公林或不屬鄞境而黃賢村則以黃公得名

是大里之爲黃賢村說較可據至夏黃公三字當連讀後漢

奉化縣志

卷二十三

人物傳一

一

書鄭康成傳曰商山四皓有園公夏黃公可證畢文簡之說

白湛淵譏之宋潛溪亦非之會稽典錄與晉書夏統傳皆稱

黃公殆取便於文至黃綺並稱不過文人隨意摘取更不足

辨乃吾鄉延祐志以下皆改稱黃公而反以稱夏黃公爲非

則失攷矣故今志仍稱黃公而附其說於此或又謂大里卽

夏里舉其里居則曰夏黃公但舉其姓則曰黃公據是則綺

里季角里先生何不省言其里乎不詞甚矣故夏黃公之爲

里爲姓不必穿鑿附會後漢王貢傳序注師古曰四皓稱號

本起於此更無姓名可稱蓋隱居之人匿迹遠害不自標顯

祕其氏族故史傳無得而詳其說盡之矣

唐

阮詵字孝羣父穀爲太子右贊善大夫詵懋德粹和處煩劇無遽

色通開元禮穀梁春秋不苟習其辭動有程法海內之士多熏其

風舉進士一不第以父任為太廟齋郎歷臨黃東海尉東海有父

子異居者子不為養詵使人問之對曰無以奉也使遺之米肉且

以其贏資之其子卒悔悟克盡孝道尋調婺州法曹參軍累遷大

理評事先是湖湘俗尚鬼歲取室女為人牲女父母亦惑於巫聽

命恐後詵命縛老巫數輩若將就屠者眾皆叩頭祈哀乃杖巫長

而遣之習遂除後以司勳員外郎挂冠歸與里中謝徵士栗臺二

三名士徜徉以終子綜繹皆舉鄉貢歷志本參軍胡登撰墓志

周諗字元都祖甯試楚州司馬父強以門蔭出身諗歷官玉山縣

丞州牧廉其才每使推勘疑獄諗飲冰勵操夙夜檢勘以副知己

遂以苦心邁疾卒歷志本顧廡撰墓志

王知蘊字積中連山大壩人幼挺奇操嘗以翊贊經綸匡持邦國為己

奉化縣志 卷二十三 人物傳一 二

任歷蘇州嘉興尉陞安吉令以廉能善政為長吏所徵仕終朝散

大夫壽王府咨議參軍監察御史柱國曾祖珪別駕贈大理卿祖

添舊志誤涂據譜正司農卿父邁黃巖縣令季父儉由開元禮上第累任

刑部尚書刺明州始去長安之萬年為明之奉化人子慎微舊志誤慎

徽案王譜慎徽為知蘊從子校書郎處州長史昌禹監察御史裏行一門貴盛

相承世有嘉績當世罕比歷志本孫郃撰墓志參臨川集

孫郃字希韓幼負氣岸博學高才乾甯中舉進士天祐間授左拾

遺朱溫篡唐著春秋無賢臣論卜世論即脫冠裳服布衣以隱著

書紀年悉用甲子以示不臣之義詩擬陳子昂有哭方干詩偉節

凜然淨惠院即其故宅其遠孫曰沔字元規宋天禧三年第進士

為人明敏果敢歷官至監察御史裏行沔先世徙寓會稽未欲遠

去墳墓乞知明州許之杜衍遺之詩云四明山水饒靈粹唐有希

見臨門集卷九十五刑部侍郎王公墓誌銘云其兄晉丞利道可也丞利者只也孫儉如也還議大夫刺明始去長安之萬年內明之奉化人云之餘為是孫拾遺墓法銘拾遺文纂在始修奉化州志時必有存者惜乎

韓竄出倫又見賢侯光乃祖暫還仁里庇斯民屬山東盜起徙知徐州以禮部侍郎致仕築居於明有詩云新治甬上居閑逸安暮

齒歷志

樓茂邨

忠義樓隘人

字希哲生魁偉雄傑十二歲通尚書既而習韜略

通騎射咸通元年仇甫反浙東觀察使王式辟茂邨爲參軍與陳斌共討之乾甯間董昌僭稱帝招討使錢鏐置之幕下與顧全武克越州光化二年表爲明州押衙九月復與顧全武攻蘇州秦裴克之三年轉銀青光祿大夫節度散兵馬使兼奉化鎮遏右廂虞侯充黃檗隘將天祐二年以兵馬使陞節度討擊檢校太子賓客兼御史中丞上柱國四年梁篡唐以錢鏐爲吳越王鎮海節度判官羅隱說王舉兵討梁曰縱無成功猶可退保杭越奈何事之爲終古羞王不能用茂邨在旁按劍厲聲曰隱言是也王亦不聽茂

奉化縣志

卷二十三

人物傳一

三

邨力乞歸老王心義之更其名曰亨開平三年王賜以墨制始奉化之壤本爲鄞鄞後改名奉化而鄞別爲縣茂邨徙自吳佐吳越王爲鎮海節度往來駐屯二縣間晚歲愛奉化鄞陽山水卜築而居之卒年九十七鄉人感其惠廟食於鄞之橫溪

忠義志

宋

祖域字貞夫

忠義松隩人

建隆中由閩徙奉化仕至殿前司統制平居

尚氣節樂施與歲飢發私廩以賑所活以千計里子弟不能學者爲招師儒使就學貧不能婚喪者助之財既歿民懷其惠立廟奉

之

嘉靖志參忠義志

林逋字君復

忠義黃賢人

少孤力學不爲章句性恬淡好古弗趨榮利

初放游江淮間後隱杭之西湖結廬孤山二十年足不及城市真宗聞其名賜粟帛詔長吏歲時勞問嘗自爲墓於其廬側臨終爲

詩有茂陵他日求遺藁猶喜曾無封禪書之句卒年六十一州爲上聞仁宗嗟悼賜諡和靖先生逋善行書喜爲詩其詞澄浹峭拔多奇句旣就藁隨輒棄之或謂何不錄以示後世逋曰吾方晦迹林壑且不欲以詩名一時况後世乎然好事者往往竊記之所傳尙三百餘篇逋不娶無子教兄子宥登進士甲科

宋史本傳參歷志

案崔應榴攤飯續談云十國春秋林克己錢塘人忠獻王時官通儒院學士博學善文章宋隱士逋卽其孫也宋史亦以和靖爲錢塘人今攷先生本集有將歸四明等作邑之黃賢又有和靖舊宅故郡縣志皆以先生爲奉化人諸家謂爲錢塘人者殆其先世僑居錢塘而先生又廬隱孤山故耳

林彰字廷昭

忠義黃賢人

少穎悟大中祥符元年授山陰令勉盡職事

以父憂歸服闋起調吉水令富民奪人妻廉罪之張豪者兄弟爭

奉化縣志

卷二十三

人物傳一

四

田歲久不決諭以義改悔合爨邑中輸糧不均貧民巨室幾同等乃爲分析以平之六年考績居最陞知柳州軍府兼管鹽鐵事以朝散大夫致仕叔父和靖先生隱居西湖噩耗至偕弟彬往錢塘

治喪稱禮卒葬雲蓋山

忠義志

沈言字聖謨

封山人

景祐元年進士任南昌推官陞河南道御史明

法制公聽斷每庭讞判決如流日理數十詞悉中冑繁政嚴令肅

懲貪振良視南昌尤厲人莫敢觸其鋒長於詩賦操筆千餘言旨

邃詞葩識者珍之卒年九十

沈譜

蔣浚明字彥昭其先自天台徙居奉化

舊志作自常州徙奉化謝山全氏曰蔣氏自唐時實

自天台來居奉化已而遷鄞其自丹陽來之蔣乃宣和學士猷之後另爲一宗

父官評事清淨急施浚明

遷居郡城

後名金紫巷

游豐稷門神宗時詣闕上書論君子小人之黨

言極剴切上嘉納之授溧陽主簿辭弗就後以稷薦除大理評事

遷尚書金部員外郎抗疏排新法被斥將謫遠州稷以其母老力爭之授無爲軍司戶遷建康戶曹以壽終累贈金紫光祿大夫子璿琬璿紹聖四年登第璿崇甯五年登第當陳瓘來鄞浚明首遣璿琬事之及先後登第瓘書連桂二字以表其坊璿知江陰歸與潘良貴唱和三江亭上有五老會皆太學舊人俱年七十餘璿與焉璿仕至左朝議大夫琬仕至宣奉大夫以忤蔡京自劾去琬子存誠字秉信太學生爲楊慈湖講學友聞歌有省德性清明

歷志

參攻媿集結埼亭集宋元學案

樓郁字子文志操高厲學以窮理爲先好著書處窮約屢空自樂爲鄞令王安石所尊禮慶厯中掌教鄞庠及郡學十餘年學行篤美信於士友登皇祐五年進士治平初調廬江主簿未幾參軍事丁母憂服除強起之曰祿不逮親非吾志也遂致仕授大理評事

奉化縣志

卷二十三

人物傳一

五

又主郡庠十餘年爲州縣士子師前後凡三十餘年一時英俊皆任席下俞充豐稷袁穀舒亶天台羅適皆執經焉郁天資孝友質厚和樂勇於赴人之急其外夷然若不見畦町而其內整密雖臨小事必有程規居鄉不自標置遇三尺童子翼如也好書不倦家藏萬卷而手鈔居半居郡城南學者稱爲西湖先生卒贈正議大夫子常光肖常治平二年進士官著作佐郎元符三年以朝奉大夫知台州光才氣俊偉不羣熙甯九年進士元豐中調婺州浦江尉歷無爲州判官仁和縣丞後以承議郎宰畿輔縣尹以勢臨之不爲動未幾罷歸卒不偶肖字夢弼攻小學篤學不衰以特奏名

補和州助教

歷志參鄞志

案舊志樓異樓鑰俱列人物傳中今攷樓氏自正議遷居郡城其後遂爲鄞人攻媿撰叔祖居士樓弃墓志著爲明之鄞

人其明證也常光肖三人爲正議之子其時旣近且或係奉  
產故補入郁傳其後則並從刪

王奕字謀道質敏而曠學博而純野服隱居講論經史以興起斯  
文爲己任守令知其賢率鄉之子弟受學焉歿祠於縣縣令秦辨  
之撰記曰學在縣治之東爲廩以受粟垂數十年前縣令樊侯忱  
悉輦而出之辨之適嗣其事將率縣之子弟以學焉念必有老儒  
先生爲之矜式者聞長壽王君之賢君諱奕字謀道行高德厚少  
力學自顧重舉一不售卽拂衣去乃遺謝世事營治舍館竹林水  
池激波其中野服杖履以書史琴書自樂至杜門卻掃未嘗出詣  
令令雖欲見之未易屈致也故將卜日願因介紹以達所欲言君  
忽踵門曰聞令治鄉校訓迪子弟吾鄉之民惟不好學爭田嗜貨  
計錙銖尺寸怒罵據鬪辭謀訟口紛紛藉藉雖親戚相陵蹂不顧

奉化縣志

卷二十三

人物傳一

六

爲政者低首受事簿書獄訟相尋狎至朱墨會稽敲榜訊詰窮晝  
夜之力不止宜其以學舍爲敝屣芻狗一切置之度外予適聞令  
之言不知胸中之氣勃勃然願爲邑人先出力以佐令乃蒞榛穢  
治頽圯講習游息皆有位置父詔其子兄令其弟惟君之言爲聽  
曰有課月有試弦誦之音徹於道路曾未閱月百里之民知儒爲  
貴來學曰益眾凡教養廩食之具旣有序會君以病告林君延之  
夢君自外至屏立以指若祠宇狀意將以爲學之神也曰予得終  
於此矣旣寤聞君病且革遽往視之氣息纔屬猶諄諄然學校爲  
念曰予雖病每暝輒往未嘗須臾間也林君益異之乃命匠者作  
小室置像設雞黍奠酒醴旣成如夢祭之明日而君卒鄉人念君  
不忘更大屋室以學士神肖君而祀之他日又見君如平生從者  
十數人徜徉而入由是眾益以爲信然君天性樂易兄弟和睦教

子姪皆有學問出入鄉黨執禮好信義蓋其所敦尚與流俗異而尤恥財力自暴鄉人爲善必竭力倡道成就乃已其所不善逡巡臨視若不忍發口使之循省自化終不以忿疾之色見於顏面士之禍患窘窮賑救貸助克滿其意周旋曲折益至不厭殊不爲後曰計惜以故君死之日識與不識爲之涕洟感動而念君之不得見也立祠堂於學之東偏以備歲時之享焉怪力亂神雖儒者所不道宗元卒柳州退之亦記其事作羅池碑則生有益於世歿而爲神靈其迹昭然著見在人而不可泯誣者皆可書於是推其行實因以記異云元祐七年三月十六日時稱奕爲元祐鄉先生子建中字師正以八行純備舉於有司不就州縣諸公率士子致禮造門強起之以疾辭

康乾志

李珂字公執曾祖直清自閩來四明寓奉化泉口珂幼孤稍長卜

奉化縣志

卷二十三

人物傳一

七

築江口爲人寬厚端靜禮賢好士年六十以家事付之長子養恬自適不見喜愠家饒於貲隨所與不校迺百倍其初亦未嘗操奇握贏仰取而俯拾也平生無他嗜好惟以周急樂施爲事梁三江甃塗路收恤孤惇教養鄉族其持心廣大與造物者合鄉人以厚德長者稱之卒年八十有八葬禽孝鄉上元山北官秉義郎著有傳家龜鑑行世子侑有傳

嘉靖府志參王伯庠撰墓志

樊紱

剡源沙隄人

其先翁州人高祖監察御史良忠徙居邑之沙隄紱

哲宗時以明經考選賜免解進士尙咸甯郡主後因蔡京用事歸隱從子康之嘗從朱子游學者稱翠屏先生康之子邦道邦獲端

莊能立博通經史樓鑰號爲連璧

陳著撰樊君復墓志參剡川詩鈔

周邦彥字美成本錢塘人政和五年知明州因家奉化其人疏雋少檢不爲州里推重而博涉百家之書元豐初游京師獻汴都賦

萬餘言神宗異之命侍臣讀於邇英閣召赴政事堂自太學諸生一命爲正居五歲不遷益盡力於辭章出教授廬州知溧水縣還爲國子主簿哲宗召對使誦前賦除秘書省正字歷校書郎考工員外郎衛尉宗正少卿兼議禮局檢討以直龍圖閣知河中府徽宗欲使畢禮書復留之踰年乃知龍德府徙明州人拜秘書監進徽猷閣待制提舉大晟府未幾知順昌府徙處州卒年六十六贈宣奉大夫邦彥好音樂能自度曲製樂府長短句詞韻清蔚傳於世

宋史本傳  
參歷志

案樓攻媿清真集序云公嘗守明州而諸孫又寓居於此合之歷志因家奉化之說似不當以流寓目之

仇恂字泰然益都人晚以被讒退居奉化子孫遂家於此恂大觀三年進士授邠州司法讞獄詳恕爲鄧城令滿秩耆幼遮泣不得

奉化縣志

卷二十三

人物傳一

八

去徙武陟令屬朝廷方調兵燕山恂餽饌畢給時主將縱士卒過市掠物不予直恂先期趣備申嚴約束遂以不擾已而恂送運餉於涿值大軍潰於蘆溝河囊橐往往委以資敵恂間關營護無一毫棄失調高密丞攝縣事剖決如流民至懷餅餌以俟決遣攝青州司錄旣行邑氓萬餘邀留擁歸縣廨時天寒皆燃火警守恂由它道出或追拜馬首曰公舍我去我必使公復來它日恂方白事郡牙忽數千人徑奪以歸守將不能遏寇起萊密間素聞恂名戒毋犯高密境密卒叛掠害官吏幾盡獨噓曰無驚仇公丁母憂服除知建昌軍入爲考工員外俄爲沿海制置使明守與宰相厚善給言士卒將爲變致遣精兵密捕統制官徐文覺之初謀縱軍剽掠頃之泛海去呼曰我以仇公故不殺人不焚屋廬一城晏然猶坐削兩官主管太平觀以淮西宣撫知廬州劉豫子麟合金兵大



入民情洵懼宣撫使統制張琦冀乘危爲亂欲先脅恂出擁甲士數千突入露刃登樓迫恂上馬恂徐謂曰若輩無守土責吾當以死徇國寇未至而逃人何賴焉堅不爲動神色無少異琦等錯愕遽散其徒人心遂定時金人出入近境恂求援於宣撫司不報又遣其子自間道赴朝廷告急帝方下詔親征而詔亦不至淮甸喧言將棄兩淮爲保江計恂錄詔語揭之郡縣讀者至流涕咸思自奮監押闔僅死於賊餘眾來歸州帑匱竭無以爲賞恂犒以酒食慰勞之眾皆感勵募廬壽兵得數百益鄉兵二千出奇直抵壽春城下敵三戰皆北卻走渡淮其後麟復增兵來寇恂復壽春俘馘甚眾獲旗械數千焚糧船百餘艘降渤海首領二人初金人圍濠州旬日未下屬天寒馬多僵死乃悉眾向淮東樞密使張浚方視師金陵恂以策說之曰金重兵在淮東師老食匱若以精兵二萬

奉化縣志

卷二十三

人物傳一

九

一自壽陽一自漢上徑趨舊京當不戰而退繼以大軍尾擊蔑有不濟者昔人謂一日縱敵數世之患願無失時浚不能用麟復以步騎數千至合肥謀言兀朮爲殿人心怖駭不知所爲會京西制置使遣牛皋統兵至恂以忠義撼之皋素勇甚以二千餘騎馳出所向披靡敵畏皋名遂自潰以恂克復守禦功加徽猷閣待制初宣撫司旣不以一卒援諸郡但令焚積聚棄城退保浚檄恂度其宜處之恂謂殘破之餘誠不能支然帥臣任一路之責誓當死守今若委城使金人有淮西治兵艦於巢湖必貽朝廷憂力陳不可浚聽其言卒全活數州之眾尋詔詣闕軍民號送改浙東宣撫使知明州挫豪強獎善良吏受賕雖一錢不貸姦猾斂迹州罹兵火旣燬恂斥厨錢助其費買田行鄉飲酒禮歲饑發官儲損其直民無死徙朝廷聞之進秩一等再召對帝親加褒諭欲留真近密言

者以恣在郡多黥胥吏爲慘酷請授外藩時峒獠未息乃進直學士爲湖南安撫使禁盜鑄錢者趣使爲農物價旣平商賈遂通數月召還加寶文閣學士陝西都轉運使時金人無故歸侵疆恣力陳非策固辭不行秦檜以爲異己落職已而金人果復陷所歸郡邑如恣言乃復待制再知明州改知平江府陞辭言我軍已習戰非復前日故劉錡能以少擊眾若乘已振之勢鼓行而前中原可傳檄而定上嘉之以言罷提舉太平觀積官至左朝議大夫爵益都縣伯贈左通議大夫恣性至孝居喪盡禮沿海置制使陳彥文薦於朝起復之不就恣端方挺特自初官訖通顯無所附麗令鄧城丞相范宗尹方爲邑子以文謁恣恣他日語其父是子公輔器也宗尹旣當國未嘗以私見恣在明州嘗欲薦一幕官問曰君日費幾何對以十口之家日用二千恣驚曰吾爲郡守費不及此屬

奉化縣志

卷二十三

人物傳一

十

僚所費倍之安得不貪遂止其居奉化嘗築長汀沙堰隄七百餘

丈又贍郡學田一百六十畝郡邑俱作廟祀之

宋史本傳  
參乾隆志

案仇遠所著稗史志孝一條曰吾里棠溪袁鎮天性篤孝云

云其下接叙家君諱聞祥母病經年每輿醫投藥皆不愈家

君炷香告天刃其右乳煎糜以食僅延母氏數月之命其下

又接叙石門毛良孫云云今攷仇遠字仁近號山村錢塘人

與白湛淵齊名夫錢塘人不合稱棠溪爲吾里又不合叙其

父事於奉人之中故疑聞祥與遠爲奉化人又攷山村集有

拜霞嶼待制伯祖墓下詩待制當指仇恣以恣曾授徽猷閣

待制也意聞祥與遠或先從待制居奉化而後爲錢塘人未

可知也然證據無多故第附其說於此

李中字不倚元符元年入太學有才行崇甯初晦於時禁歸不復

仕大觀中鼂說之以上書謫監明州船塢士無敢謁者中從之游識者高之中嗜蘇黃之學高明深遠爲文章成一家言宣和二年卒樓鑰題其墓曰國子鄉先生子敦義學有師承讀書綴文多自得孫光輔禮部進士光祖稱薌灣先生曾孫元淳長鄉校

歷志

黃子游字叔言其先由浦城徙陳州子游自度支郎出守台州遂家奉化崇甯星變父宰上封事論蔡京逮赴御史獄長流海島子游號訴於朝願以己官贖罪得不死建炎初歐陽澈以上書忤宰相黃潛善坐棄市子游適同邸爲殮葬之輟所乘馬賙其子飛英歸紹興初臨安建行都官府署舍皆子游經畫後不能易權度支郎官以勞陞副使進秩一等會江西新罹劇盜朝廷知其仁恕選提點本路刑獄未赴改知台州徙池州台產鹽池產茶姦氓囊橐其中重法不能禁子游治以輕典人不忍犯在池二年獄無重囚

### 奉化縣志

### 卷二十三

人物傳一

十一

屬縣青陽後唐以爲宋齊邱食邑稅額十倍子游奏裁其半民爲立祠去官歸食祠祿五稔積官左朝請大夫賜服金紫築聽雨堂橘隱齋兄弟四人華顛相從卒年八十八葬金峩山子仁儉有傳

周必大撰墓

志參歷志

陳德剛字應中

剡源三石人

曾祖顯第進士授主簿累遷戶部尚書政

和二年言復相蔡京士民失望貶知越州歸隱蜜巖顯弟黜任司諫亦以疏詆蔡京謫監酒稅而卒父伸仕至國子祭酒慶元初僞學論起七上章辨之竟以是去位尋拜吏部尚書韓侂胄北伐又上書切諫出爲京湖宣撫使遂乞致仕德剛歷官戶部侍郎理宗立遷工部尚書論濟王之冤忤史彌遠奉祠紹定六年除知福州入對上慰勞甚至因問夾攻蔡州以復讐何如曰在國家不可一日忘此事恐此舉之後方煩聖慮耳上曰朕與廷臣深計之時不

可失也德剛曰所謂時者人材資用無匱之謂陛下還有之乎上默然端平元年請復濟王官爵從之居七日卒

歷志參鄞志

沈虞卿字明輔言曾孫政和二年進士知黃州府時饑饉相仍餓殍載道虞卿至悉出俸錢易米煮粥以濟全活甚眾置義田創書院以贍養士子自是一郡多賢士海內企仰至有沈夫子之稱卒年七十性廉介所遺惟古書數部及父母封誥而已

沈譜

曹粹中字純老定海人居邑之三石父實宣教郎粹中宣和六年中進士丙科師莊簡李光卽爲其壻莊簡師元城其學問以躬行實用爲先光與問紹興國論秦檜欲一識粹中粹中時待次無爲校官曰吾已有差遣見丞相何爲語其妻曰汝父必不能與相久處光後貶海南粹中不復仕自號放齋以著書爲樂有詩集三十卷行於世後張浚力薦於朝通判建甯府乾道三年致仕累贈中

### 奉化縣志

### 卷二十三

人物傳一

十一

奉大夫

寶慶志參攻媿集結琦亭集

舒卞字彥循

奉化鄉廣平人

宣和六年進士有文武才畧建炎間禦金人

有功岳武穆聞其名招至幕下戰謀多其贊畫卒贈宣議郎鄉人

思之祠於長壽鄉子黻黼孫琬璘皆名賢

歷志

李侑字子列秉義郎珂子篤志好學邃於諸史建炎四年正月己未金人陷明州列城瓦解邑爲台溫孔道寇且逼侑率義勇援兵

社夫凡千一百八十四人拒之庚申乙丑丁亥

案此據寶慶志原文今攷是月甲辰

朔乙丑之後不能有丁亥當是丁卯之誤

三戰於泉口招賢等路賊不敢進寇去兵罷

犒給之費餘萬緡皆侑身任之口不言功而恩賞亦弗及蔡幼學云渡江之初帥守棄城者相踵也而子列獨以身捍一邑然則安危之勢豈不以其人哉爲上其事賜官修武郎侑才智卓絕慷慨好義遇事剖決迎刃而解寇盛時王從侍二親避地南來聞義勇

投之眾聆其北音將殲焉侂曰此士夫之族也問知爲三槐家益善遇之

寶慶志曰從後知信州每語人曰微子列吾家無噍類矣

嘗集客爲父壽壻獨不至侂

知有負於官急舁錢償之壻得預席人有侵葬其先塋之側者或請訟之侂曰訟當徙柩季武子成寢杜氏之葬在西階下請合葬猶許之茲特隣逼耳初無害吾事況業已掩藏忍復使之暴露耶居喪哀毀骨立父歿七日或謂日在辰毋哭侂曰人子哀慕情深不能自己至葬日用壬申又謂葬者雖安於公獨不利侂曰若先人之靈得安於地下違他恤哉識者謂其孝而達侂明於陰陽家壽夭禍福之說嘗語人吾年止五十六至是疾終適符預語之數死之日遠之深山窮谷婦人孺子莫不相與驚歎惋惜子九人四

充庭有傳

歷志參張仲房撰行狀及攻媿集宋元學案

任戡字彥遠少英敏多勇畧每慕張子房諸葛武侯之爲人嘗歎

奉化縣志

卷二十三

人物傳一

十三

曰二賢若在吾願爲之執鞭與李侂董之邵俱以慷慨好義稱泉口之役戡與侂之邵奮義鼓勇共率家丁數百人乘間出奇以擣金金不敢犯官修武郎孫三傑三俊三恕皆進士曾孫謙之特科

謙之子龠亦進士世有顯名

歷志參兩浙名賢錄

董之邵好義有力宣和間睦州賊起浙東震動承命防捍補承信郎建炎四年同李侂任戡禦金人於泉口勝之紹興間使三韓充中節使轉修武郎孫仁聲仁澤仁森俱登進士後世世科第不絕

康乾志

林延熙字中和

忠義黃賢人

天資謹厚嘗曰富貴吾自有何博一官爲

建炎三年虜騎犯維揚詔發海舟防緩急延熙遣長子玠引棹西津截其險阻以功補校尉已而駕幸永嘉遣仲孫材隨之事既輯人以此論薦延熙曰吾祖徙居於此數世矣安享海邦愧無涓埃

之報何區區勞敢自陳也識者重之金人殘毀他郡士大夫倉皇排闥至招納款遇不失禮彌月分袂莫不灑淚啣其德意卒年八十有六時有同里卓裕字公綽卓性字德靜亦各以忠義自奮引舟防衛以功補校尉

忠義志

鄔友直字正臣

金溪停山人

少有志節不類諸兒未冠二親相繼卒哀

毀骨立與兄協力營生以養諸季折爨後治產日增復捐有餘以佐之靖康中虜人擾邊鄉閭乘間剽掠友直部里社守護一隅郡將上其事補武進校尉不出嘗歎昔人居家置千金於是俯仰拾取以求田園廬舍爲事居數歲百倍其初性惡浮奢及家益肥專以簡素爲尙闢館舍爲子求師東萊呂祖謙嘗館於其家友直嚴毅重厚與人言是是非非必極其當里有紛爭取決一言以恩封

迪功郎卒年七十子必明預漕薦

呂祖謙撰墓銘

奉化縣志

卷二十三

人物傳一

十四

楊琛字獻子登紹興四年進士官江東提刑司幹辦公事鄱陽士多師事焉拜國子博士召試館職韓侂胄專政遂拂袖歸杜口不言時事端平初特官其子斯士琛負器識富文學與舒文靖王宗道以詩學倡後進時四明詩學最盛奉化尤得淵懿

康熙志參至正志

趙敦臨字芑民

松林白水人

父良佐贈承事郎敦臨紹興五年第進士

初爲蕭山主簿校劉恕外紀刻於越郡守使者交薦之改湖州教授十五年令景清邑塘壞敦臨修築之東自浮橋而上至望來橋西循溪曲而南至迎恩橋合四百丈視舊增三之二且爲通衢以便往來榜曰趙公塘敦臨少入太學同高閎見楊文靖於京師以正其所學自是四方名士翕然嚮慕魏杞汪大猷童大定其門人也所著語孟書禮春秋皆有解其記奉化學曰教學不明禮義消亡讀書爲官不爲道仕宦爲身不爲君父兄之詔告師友之話言

非富與貴則眾笑之以爲不知時務其流禍遂至此極也其論學者審其是曰孟子學夫子人皆信以爲然子雲學孟子人皆不與焉何哉蓋學者信其行不信其言故也其送陳揚庭序曰學詩而不達樂之情不過知詩之言未可與論詩也學樂而不達詩之意不過知樂之聲未可與論樂也其愛曰箴曰進德修業時不可失堯舜湯文學焉汲汲尼父亦言終日不食如何良辰耽寢事佚王深甯嘗輯而序之曰斯文也黃收純衣之制太羹元酒之味也昔者子朱子謂前輩爲文明白磊落切指事情無睚眦側媚之態愚於芘民之文見之矣

延祐志參康熙志及浙江通志

劉濤字致遠

剡源公塘人

幼孤歲冠始讀書一過目輒解大義中紹興

五年進士調壽昌縣尉兼主簿發摘無隱人皆驚服陞從政郎授黟縣令民舊苦浮費悉爲撙節摩撫耄倪蘇息歡聲溢道任滿改

奉化縣志

卷二十三

人物傳一

十五

宣教郎知龍泉縣籍凶役爲民害者摘而治之終其任無一敢肆惡者轉承議郎充淮東安撫使幹辦公事賜五品服轉朝散郎通判撫州郡昔饑疫民物故者眾不能具棺殮埋之野濤過之惻然募民收掘得數千骸埋之義塚臨川令漫不省事械繫滿獄濤臨決三十二事縱所不當罪者八十餘人及罷歸民皆遮道焚香羅拜轉朝請郎通判處州丁母憂所居里曰公塘厥土燥剛禾鮮登乃捐己錢募民界市中鑿河直亙五千餘丈深尋一廣尋二引六詔左溪二水灌溉民田一千餘畝映帶廛居二百餘家復建鎮東橋開義井甃闢道途直踰晦嶺延袤二十餘里晦嶺之西土田尤廣復捐己貲築王村俞村等堰霑浸兩岸二千餘畝損壞者悉加完補民感其德立生祠於嶺巔以報之免喪通判漳州轉朝奉大夫行次臨漳感疾而卒

乾隆志祠祀洪村廟記

曹忠字因明粹中仲子天資穎悟記誦絕人未冠已博綜經史百家天下形勢兵家之學靡不貫通爲文兼備眾體操筆立就獻高廟萬壽賦觀者無不歎服其工少嘗題甯都金精山有曰手擎白日浴滄海氣使列嶽如羣兒父見之爲失色且戒以力除此等氣象務爲實學乾道三年以父恩補將仕郎明年銓試上等授迪功郎爲平陽主簿歷知江陵嘉興長谿縣通判楚州終福建轉運使主管文字積階至朝請大夫所至輒著能聲爲大吏所推重其令江陵也辛帥棄疾治盜嚴有盜牛者配江州吏緣其意欲沈之江忠慨然稟白棄疾改容歎賞卒如令寸金隄去城二里實捍大江衝突之患歲役人夫數千習爲具文忠調夫均平躬自督課增卑培厚以爲永利嘉興劇邑當孔道民牒訴山積以五鼓治事遲明而畢人歎其敏既至長谿適棄疾帥閩以鬻鹽來委忠謂縣爲出

奉化縣志

卷二十三

人物傳一

十六

產之地開國以來未嘗與民爭利持不可其通判楚州尤悉邊事嘗論五事一乞令楚州守臣仍舊節制出戍軍馬二乞開壽河爲山陽饋餉之備三乞申嚴淮禁四乞止用官會不必再印兩淮鐵錢交子五乞開淮東荒田以實邊儲習邊事者皆以爲當張南軒柅嘗引置簽幕謂其直論敢言不肖詭隨忠少負氣節攻苦食淡事親盡其孝敬尤篤於友愛聚書萬卷多手自讐校自號牧菴居士

卒年六十八

樓鑰撰墓志

黃仁儉字約之度支郎子游子幼警敏長於記問恬淡韜晦不與物競人莫窺其際調嚴州淳安主簿淳安俗獷悍歲時競渡多殺傷尉懼而在告仁儉攝尉事臨之帖然嚴歲取米數萬石於婺其數常虧仁儉使受米於蘭溪去取以公吏不能欺轉監台州支鹽倉攝郡幕給軍衣有紕薄者羣卒大騷坐上皆失措仁儉徐呼其



長諭以禍福羅拜曰黃佛子言敢不聽遷青田丞青田鐵坑錢多以促辦害民仁儉期會寬而信課反盈於舊時永嘉籍海舟篙師爲兵乞取家屬小人乘勢指怨家妻女爲家人帥司檄使覈實得免人咸德之轉餘姚丞儒林郎致仕後授通直郎賜緋衣銀魚卒年八十三其先世與二蘇同年通婚媼書尺甚多兵火之後所存者仁儉悉刻於石仁儉書法甚精源流二王而遒勁似歐陽率更眞草行書皆見重於世

樓鑰撰墓志

舒黻字德觀一字德濟宣議郎卞之子紹興三十年成進士授右迪功郎贛縣西尉任滿監行在贍軍激賞東庫再監潭州南嶽廟致仕轉通直郎進秩承議黻忠厚誠篤敦行孝弟聲色貨利不入於心最與童持之講學相睦文行重於鄉陸文達謂其溫恭足以警傲惰之習粹和足以消鄙倍之心聞者以爲篤論卒年七十四

奉化縣志

卷二十三

人物傳一

十七

子七琬球琥琪俱有聲於時璘尤著琬字傳正淳熙十一年進士福州簽判樓宣獻謂其負氣敢言又盛稱其尉武昌政績球字東美淳熙十一年進士潁州太守琥字西美淳熙五年進士陵子稱其樸茂無他蹊徑琪字元英家居教授子弟亶亶可觀慈湖雅重之璘有傳

承議墓志參學案附錄

案此下舊列吳秉信傳今攷秉信非奉人從刪

童大定字持之

松林白水人

師事鄉先生趙敦臨總角入鄉校有聲會

舍法罷遊京師中左學選所交皆一時名士侍郎高閔愛其粹美盡以所聞相授復從楊龜山遊就正其所學靖康之亂歸盡取古今書讀之造詣益邃紹興十三年再入太學十八年登進士第調漢陽尉親履阡陌正其疆理收漁戶稅不私一錢郡將王棼謂僚屬曰此渾金璞玉人也調永嘉丞轉江東漕屬所至有善政聲譽

四起臺府爭援以爲助改宣教郎以例授徽州教授轉奉議郎通判靖州軍事料理軍機動無遺慮守專功賞亦無所憾解秩丐祠主管台州崇道觀大定純明篤實信行於鄉閭道行於妻子所至聲稱赫然

歷志

王時叙字伯倫第乾道五年進士歷嚴州遂安縣時郡守賁逋於十年之外甚急時叙謂從事曰邦侯素不困疲瘵之民何遽變更果爾罪去誠甘之守知不可奪遂已編修陸游爲郡日縣上所斷僚屬咸會陸以遂安狀銜袖曰得一好文字爲諸公出之且讀且喜曰使諸邑皆如遂安吾輩可以卧治及卒陸誅之曰學道愛人正心誠意悃悃無華儒雅飭吏子之自著古人何愧有文集二十

卷藏於家

歷志

王時會字季嘉與兄時叙同年第進士自迪功郎七遷至朝散郎

奉化縣志

卷二十三

人物傳一

十八

賜緋魚袋初魏王判明州累年時會遺書丞相史彌遠言國家早建儲宮以定天下之本而魏王偃藩在外天下皆以爲當然者父子異宮豈若用故事使得日奉朝謁從家人之樂哉彌遠歎息稱善會魏王薨言不果行嘗知會稽適歲潦郡督已蠲之賦甚急時會持不可守不聽乃袖告身易服立庭中守爲奪氣民賴以紓遂修社倉之政立保五之法以察不孝不弟遊惰不逞者風俗一變會營永阜陵吏抱文檄如林環案立時會省去其十之七餘不可已者召民給錢粟與爲期會民不知役而事悉集少銳意經學有易詩書論語訓傳鄉飲酒辨疑又喜爲詩有泰菴存稿三十卷及病革猶強起拱手端坐無惰容顧家人曰吾學易晝夜之理甚明遂卒子宗廣以恩補官

陸游撰墓志

袁良佐字輔德未冠而孤從諸兄事母恭順戮力終其身如一日

天資渾厚與儕輩處如不能言見有不善則頓足不安遣子從師  
勉以學行不計科舉居家則告之曰毋侵公以植私家乃睦母弛  
勞以怠事業乃成方寢疾男女婚嫁皆及時戒之曰我死毋效薄  
俗匿親喪以苟合病且革其友壻舒璘往視之則徙榻於室之東  
偏璘曰此非正寢也聞之亟命反諸室有頃而歿類稟袁輔  
德墓志

汪汝賢字季賢

松林雙  
溪人

父邦式高州助教兄弟三人湛於友愛居

同時葬同壙題其家舍曰歡同汝賢紹興末輸財佐軍補西安尉  
有朝貴敝民山吏不敢問汝賢直之吏駭服父憂免喪轉常州錄  
事參軍盡心讞議民以不寬寬恤茶商權貨無壅任滿丁內憂葬  
有日疽發於背力疾治寔事反哭浹旬而終年五十有六汝賢姿  
秉溫厚恥言人過喜怒不妄發承藉遺業約己安分賑恤窮困皆

發於誠子伋份有傳

康熙志參舒  
璘撰墓志

奉化縣志

卷二十三

人物傳一

十九

舒璘字元質一字元賓承議黻之子狀貌不踰中人而雅有大志  
恥以一善自名每自循省苟不聞道何以爲人汲汲乎如飢者之  
索食補入太學時張栻官中都每請益有所開警朱文公與呂祖  
謙講學於婺徒步往從之以書告其家曰敝牀疏席總是佳趣櫛  
風沐雨反爲美境又與其兄琥弟琪同受業陸子之門兄弟皆頓  
有省悟璘則曰吾非能一蹴而至其域也惟朝夕於斯刻苦磨厲  
改過遷善日新有功亦可以弗畔云爾於是躬行愈力德性益明  
其學以篤實不欺爲主成乾道八年進士兩授郡教授不赴繼爲  
江西轉運司幹辦公事或忌璘所學望風心議及與之處了無疑  
間教授徽州以身率之諸生漸知向方築風雩亭以時會集暮夜  
亦間往講貫涵泳質有不善循循善誘未嘗憤疾端吾矩矱需其  
自新謂諸生曰某亦幼不知學及壯入成均藉師友發明以拯淪

胥之患今欲以其所同然者公之君輩新安宿儒楚椿汪廷祐等以書幣延之爲學正使學者知所矜式又著詩禮二解以授學者時沈端憲爲國錄璘曰師道尊嚴吾不如叔晦若啟迪後進吾不敢多遜於是司業汪達首欲薦璘或謂舉員已足達曰吾職當舉教官舍元質其誰先留丞相正曰天下第一教官也徽人亦曰吾鄉學問之途賴先生室而復通璘素以天下爲己任雖居冷官未嘗忘世事於是議荒政茶鹽常平義倉役法上之牧守其採而試者效輒響應尤留心中朝治亂之故樓鑰授舍人貽之書曰十月震電甚異大防當思爲宗社久安計不敢以賀詞進甯宗卽位璘貽徐子宜書曰聞山陵地未定聞大安宮只就南內又聞新君猶未得躬問寢禮不審遲疑何故某憂國之念若懸旌又曰民命病極矣水災甚廣中朝曾作利害事拈出否又貽陳英仲書曰集賢

薦之者既自以爲恩於彼而受者亦以爲恩於我遂使聖人舉賢之公道一變而爲干祿之私情拜爵公朝謝恩私室門生恩府之稱自唐以來數百年名卿大夫亦未能變豈不曰人皆有欲貴之心人應有報德之事彼既以知己遇我吾不委己而歸之非人情歟抑不知古人之事上苟理義相同則志意交孚其合也講道於一堂其睽也晤對於千里出處用舍禍福利害其關節脈理之相應雖無私情之感而斷金之利蓋有終其身而不忘者苟其舍是而必欲委己以露其感恩之狀所舉賢耶知己之報固當不然見利則逝見便則奪而亦何恩之有蓋勢利之交出乎情道誼之交出乎理情易變理難忘也諸舉主得書亦雅重之宰平陽臨政聽斷人服其平時郡政苛璘舉民病上告辭嚴義正守爲改容踰年自喜曰簿書鞅掌幸不至以勞勩喪本心蒙襍而著聖言豈欺我

奉化縣志

卷二十三

人物傳一

二十一

哉秩滿通判宜州未赴卒年六十有四璘資稟粹和學術正大嘗自言淵源所自曰南軒開端象山洗滌老楊先生琢磨袁燮謂璘篤實不欺無毫髮矯僞楊簡謂璘孝友忠實道心融明樓鑰謂璘之於人如熙然之陽春所著有詩學發微詩禮講解廣平類稟淳祐中賜諡文靖璘又自言樸拙不能文章然嘉定初朝廷革文弊選前輩程文以範後學璘文實冠編首五子鉞字和仲鉞字子仲銑錯鑿字純仲皆能傳其家學未嘗一毫苟求璘既歿益遵先訓相勉以善鄉黨中以爲儀表

宋史本傳參歷志及宋元學案

李充庭字伯振修武郎侑之四子也資孝謹最爲大母鍾愛躬行善道刻意教子命長子元白受學舒璘歸以淑諸弟於是文風大振遂爲儒門鄉里歆豔其教子以踐履爲先不專事舉業及名第寢興視之亦藐然沖淡無競里有彊獷遇之輒斂避平居以書史

自娛前言往行有契於心必書之座右閒作歌詩平淡如其人閱  
名臣言行錄詩以記之至百餘篇以子封迪功郎轉承奉郎嘉定  
三年卒得遺言於篋中區處後事甚悉戒喪葬俱循古制子六元  
白詵伯詞伯俱進士

攻媿集承  
奉墓志

舒琮字伯禮父黼文行表後學就而請業者非齋邀不敢近口授  
指畫沾丐者多琮年二十四與鄉薦淳熙十一年以特恩射策中  
甲科授迪功郎調處州麗水主簿轉修職郎到官百日歿琮聰明  
秀出學業精勤踐行篤厚父母終兄弟情不忍異間言入耳則厲  
聲叱之終其身門戶如一涖官未幾上下交孚其歿也守倅僚佐  
逮吏民皆哭泣盡哀乃去

類稟伯  
禮壙誌

趙汝擢字待用宋太祖八世孫律身謹嚴一介不苟淳熙中取應  
歷官建甯贛州南安嘉定五年南安西溪峒尹彥輝跳梁汝擢挺

奉化縣志

卷二十三

人物傳一

二十一

身入洞諭之彥輝泣拜曰天賜公活彥輝等命頓首謝南安遂平  
復被命經理蘄春事務撙節撫摩有方雖至府庫稍充未嘗一開  
宴受代牙契錢七十餘緡吏白充行費堅不受有以母夫人年尊  
勸者自批其頰曰汝擢面皮如此豈更望溫飽耶其人語塞前後  
在南安贛吉逾三十年屹然當沿邊重寄撫循經理民皆以父母  
戴之及去灑泣請留入朝上二劄一論軍民之政一論練兵之法  
皆切中利害及軫轄蘄春清明聞天下雖退處山澤隱然爲當代  
人物之宗尤善知人邱岳自下位薦進余玠以布衣見知繼守海  
陵二人皆以才畧當干城腹心之寄居家甚貧苦人以拙清詆之  
聞而笑曰是知我者濂溪之賦不云乎天下拙風清弊絕吾病未  
能也端平三年特授復州團練奉朝請以屬稱皇叔繫銜嘉熙三  
年孟冬薦享太廟是年病不起無以殮朝廷給喪葬費特贈集慶

軍承宣使追封奉化郡公葬禽孝鄉倪山其先自靖康之亂曾祖母王令人自汴京抱二孤避難渡江至奉化父善纁生九子汝擢

其長也

康乾志

蔣峴字伯見琬曾孫性剛不阿慶元二年進士授太常掌故改武康令有治聲調岷縣燭幽摘姦民以爲神大理評事胡夢昱以言被竄峴獨曰夢昱所言果有益於朝廷雖直庸何傷不必論及舉主也彌遠怒黜峴臨安府城南監廂遷知安康軍後薦拜右諫議大夫事有不可必廷辨面折端平初除殿中侍御史兼侍講侍讀史嵩之欲開督府與樞密李宗勉論不合私請劾之峴曰宗勉無過可言臺諫乃耳目官豈受私謁耶及滁州破峴言督府開久滁州之破自若督府何益乞劄示收復旁側聞之縮頸峴曰臣爲國謀不爲身計嘗劾鄭良臣上曰良臣嵩之所舉峴對公論不容臣

奉化縣志

卷二十三

人物傳一

二十三

不知嵩之也嵩之復以書罪蔡範袁肅等峴曰此有用之才不可誣也晚年當理宗不豫有謀逆者弭變功甚大歷官刑部尙書以寶章閣學士乞祠歸幅巾布袍娛情詩酒築別業姚江遊歌旬日不倦觀者望若神仙中人居恆自矢曰勿欺心勿負主勿求田勿

問舍號曰四勿居士

歷志參全祖望湖語注及餘姚志

鮑俊德字日新少字明叔與兄德光相勵勉洛誦聲澈夜旦不休工賦篇兼長於書多記經史子傳之文喜爲人講說纏纏可聽以其餘力爲詩詞發語清麗性端重簡出三兄繼歿獨任仰事俯育之寄經理生事處之裕如與人交關務適其平孝謹和易尤篤親故見單寒者解衣遺之無德色間有造門觴豆留連談笑不倦閱人甚眾交情無纖芥之間儕輩或致位通顯曾不以毫末干請人尤敬愛之病且革戒其子無爲檜襍事遺言琅琅有序卒葬嵩溪

王鏗祖塋之側樓鑰撰墓志

舒鉉字舉之性質明敏學問淵源言行以古人自律登嘉定元年

進士授翰林學士康乾志

王文貫字貫道時叙子蚤嗜學與鄉先生余端臣遊登寶慶二年

進士教授真州除宗學論文貫精毛氏詩以輔氏爲宗從遊常數

十人汪元春黃震皆其弟子也弟宗道字與文案陸游撰王季嘉墓志孫男五人其

四曰與文卽宗道之從姪也名字不應相同當有誤號怡齋嗜古人之學窮眇討幽時出其

奇見人多稱之第嘉定元年進士爲江東提刑司幹官時四明文

推宗道健筆著述甚富歷志

案歷志以文貫爲鄞人宗道爲奉人今攷宗道爲文貫之弟

歷志俱無異詞查王氏通譜文貫宗道俱時叙子而寶慶志

於時叙注時會兄於宗道注時會姪是宗道爲時叙子文貫

奉化縣志

卷二十三

人物傳一

二十四

爲奉人俱無可疑鄞志認宗道爲文貫之弟而謂非時叙子

其說不足辨又據寶慶志改宗道爲安道今攷寶慶志實作

宗道不作安道然王氏固有安道之名乃宗道弟耳

李元白字希大學案作字景平誤景平其子以稱字也承奉郎充庭長子受業舒文

靖公璘深於詩禮嘉定十年與長子以稱由舍法成進士廷對力

陳二說其一論合天下之賢以起事功其一論容天下之言以作

士氣授零陵校官以身率先士咸知奮理宗嗣位以薦除國子正

輪對一主於正心遷太學博士再對詞益懇其畧曰有聰明之大

德必有祇懼之小心聰明一也善用之則爲慧爲哲爲聖爲神不

善用之則爲察爲苛爲暴爲肆且謂大廷端莊而戒謹於燕私亦

是心多難怵惕而警察於閒暇亦是心始初勵精而持循於悠久

亦是心上聳歎久之次奏荒政賑恤極有條理詔下諸郡行之尋



遷國子博士以祿弗及養屢奏乞去上以元白碩德宿學宜留其  
行俾參經幄擢禮部郎官充崇政殿說書誥下曰是要君也懇辭  
不拜紹定三年三月丙午自學歸端坐而逝年七十有一葬所居  
西五里佛迹之原元白天資明粹氣和而栗始能言母張氏教以  
二南輒成誦比長恂恂篤實不事袿襖沈潛羣經考覈傳注參以  
濂洛先儒格言事事物物反而求之於身或齋居終日精思體認  
至忘寢食其教學者謂孟子之思誠程子之持敬是徹上下貫內  
外事所以立大本大經者在此屢持鄉漕文衡及參禮部貢舉諸  
生有刻志好修者力以聖賢事業誘掖獎勸凡從遊者進德有次  
第入道有規矩門人以次相授黃應春杜夢冠安劉王良學其傑  
然者著有讀經纂義讀史纂論語孟義類學庸圖說濂洛師友問  
答辨疑子集句元通若干卷詩禮講義二百篇雜文五十卷

宣  
續  
撰  
墓

奉化縣志

卷二十三

人物傳一

二十五

志參  
歷志

案至正志叙三江之學謂門人以次相授黃應春杜夢冠安  
劉王良學其傑然者宋元學案引此謂王良學鄞人厚齋先  
生長子而徐舍人遂有尚書續取江口李氏以姻婭爲師弟  
之說今攷尚書年譜生於嘉定十六年當李三江卒於紹定  
三年時僅八齡已不能及三江之門而謂尚書之子與三江  
爲師弟失之遠矣然至正志以次相授云云必非無據今以  
年輩核之王良學殆受業於黃杜諸人蓋三江再傳弟子也  
李詞伯字希岳初名詢伯避景獻太子諱改焉承奉郎充庭五子  
昆弟六人長元白受學於舒文靖淵源正學以授諸季詞伯穎悟  
夙成見聞博洽屬文有根柢自少年儻聲藉甚氣體嚴重言動必  
於繩矩喜誘掖後進見片善則獎成之嘉定議和戒上書極言屈

中國之體徇黠虜之情非自治上策虜旣衰欲復遣以金幣又言有機不乘抗論激壯媮懦者皆悚紹定二年以太學宿儒別試第一成進士授襄陽府南漳尉襄帥以師儒禮之檄攝郡博士時金浸滅制閫銳於納降詞伯貽書當路謂宜因所納之士處所歸之民辟僉書光化軍判官北人闖均房屬郡將病詞伯嚴勒武備堅守孤城敵不敢犯特轉奉議郎差充京湖宣撫司機宜文字端平元年薦除太守簿兼樞密院編修倣日麻自開禧訖嘉定凡朝廷處分將帥申請邊防得失與甲兵儲峙賞罰陞黜之類別爲三十卷曰省府禧嘉會編上覽而善之命改秩峽州進直寶章閣移知鄂州未赴召入爲宗正丞兼敕令所刪修官改兼沂靖惠王府教授疏奏端平更化弊有未除摧剝之吏自若紊紀之將不懲民力已窮敵謀莫測兼之災異數見饑饉洊臻內而大臣顧忌無協恭

奉化縣志

卷二十三

人物傳一

二十六

和衷之誠外而諸帥猜阻乏一乃心力之志苟且目前莫知善後伏望諭廟堂之臣徇以至公勵邊閫之將殫其忠赤俾之任事克諧國祗可殄至於振紀綱明賞罰敬天恤民又在聖明加之意耳上聳異久之擢著作郎崇政殿說書兼國史編修實錄校討論帝王之學本於正心欲正心者必有所事遂集諸經爲心鑑一卷上之復言時政得失大臣不悅除提舉湖南常平茶鹽兼武岡軍節制軍馬黜奸除蠹持節十州控制溪峒惠流威攝民獠悅服以年丐祠授右文殿修撰提舉祐神觀嘉熙三年卒年七十有二詞伯性孝友急義好施家無遺財惟有書萬卷自號清巖老子次子景星將作監簿兼國史院編校文字力學有文世其家

王應麟撰墓志

竺大年字耕道父碩字碩夫疊疊篤厚隣里稱善人大年受業鄉先生沈端憲性行嚴重理學淹貫尤長於說禮家法整肅鄉人皆

化之所著有禮記訂義等書卒年八十四歷志參學案及沈端

陳師稷字良忠義鵠人善詞賦嘗試進士舉不售去試武舉絕倫又

不售輒歸而問道於鄉先生楊文元舒文靖沈端憲之門閭里推

尊為儀範卒年八十三以子肖孫貴贈朝散郎戴表元撰陳功父墓志參忠義志

蔣曉字堯臣父嶠貴溪縣丞伯父峴為諫議大夫奏除京官不受

登淳祐七年進士知武進分水皆有聲以將作監主簿終曉為文

勁正閱唐金石刻最多故其文時似之善威儀巍坐終日不倦宋

亡杜門不出所言皆唐宋遺事卒年七十一子昭先以儒入官歷志

參袁楠撰蔣公墓志銘

汪伋字及甫錄事參軍汝賢子自為兒時識趣已不凡長益嚴重

有立志舒廣平之未第也錄參器之妻以女伋與之款密薰染浸

灌因而熟聞四方師友學問操履之詳又從太學錄沈煥將作監

奉化縣志 卷二十三 人物傳一 二十七

楊簡講立身之學一話一言服膺無斃雖生長巨室而飲食被服

與寒素無異義所當為勇決不靳高年者敬餽之匱乏者周恤之

可教者獎拔之或畢其嫁娶或助其喪葬新縣學建石梁為費不

貲建炎十年中興大役費緡錢殆數百萬歲租減價而糶凶年捐

廩賑饑代輸口賦關征以寬民旅仁心孚洽士之過其里者必求

見焉淳熙中補迪功郎調漢陽尉不赴紹興四年轉從仕郎請祠

監南嶽廟仍事親惟謹家政疾徐得所尤急於教子以身率之雞

鳴而起誦書有程點勘訛舛手自親之雅意林壑幅巾藜杖逍遙

自適時以棋酒自隨款故人隱士之廬譚論竟日精神不衰既屬

疾語人曰吾將逝胸中了無一事卒年七十一葬松林鄉安住山

以子貴贈朝議大夫弟份並好義樂施官監鄂州戶部大軍倉長

子龍友受業永嘉葉適端平二年進士袁燮撰墓志參歷志

戴日宣字德甫自少嗜學鄉先生李若訥胡仲皋俱耆儒宿望皆師事之又受業於袁正獻之叔父通守章以習書貢於鄉試南宮輒不利益奮勵讀書爲善性寬平不設防畛遇人無貴賤老少敬之如一小有過差痛自懲艾以觀過名其齋蓋有意於切己之學者以累舉特恩授迪功郎仙居縣主簿卒年七十七

袁燮撰墓志

胡處約字詳之幼有識趣長而貪學立身處世未嘗不以前言往行爲準或以義舉告躍然從之無難色每日吾無他長惟信義二字終身不敢違晚築室於萊山之麓下瞰碧泉取山下出泉之象榜其堂曰育德朝夕觀省涵養此心平居簡淡不干名譽

袁燮撰墓志

李鶚字雄飛乾道中楊子嘉授徒里中鶚師事之又受業於沈端憲楊文元袁正獻工詞賦作策言當世得失甚辨氣貌深厚共學者咸愛重之事親不有私財執親喪惟謹家於金谿沈端憲嘗曰

### 奉化縣志

#### 卷二十三

人物傳一

二十八

觀此地山川未爲奇麗而人物秀出乃有若雄飛者戶部尚書李某時倅郡欲遺其子就學一日訪焉遜謝不敢以衰服見李歎美而返

袁燮撰墓志

胡謙字牧之號東齋弟誼字正之

案袁甫撰正之墓志云明璧持其叔父牧之所敘言行泣請

銘據是則正之當爲兄

同事袁正獻傳陸象山之學誼與袁甫友善骨清神

靜筆端灑灑無俗氣正獻愛之曰修謹士也與時不偶益讀古聖哲書建聚書樓扁曰觀省自號觀省佚翁謙著易說易林誼著尙書釋疑十卷觀省襍著三十卷兄弟文學爲鄉表儀

歷志參墓志

李以申字景厚修武郎侑之曾孫事後母以孝聞又篤於手足之愛嘉定十六年登進士授迪功郎主泰州海陵簿部使者以職業修舉薦於朝淳祐元年轉承議郎知溧水連歲不登民生艱苦催科不擾而人自樂輸雖饑饉之餘銖積寸累未嘗以匱乏告諸公

偉其才忽感疾以朝奉郎終於官年五十八

袁甫撰墓志

李以稱字景平禮部說書元白長子嘉定十年與父同登進士典教新安及京庠推明道學士心傾向改宣教郎知銅陵縣始至值淫潦縣治澐爲巨浸民廬官舍悉遭墊毀急請錢粟賑民躬行按視水旣平支傾苴罅區處纖悉無一錢一粟不使民受實惠召赴闕對策時端平更化皆喜作新之政以稱獨謂天下之規模當以氣脈爲主大略謂前日之事諱病拒藥庸醫固守一說日月沈綿是固喪生之道今日之事怕病貪藥羣醫交進其說溫涼並試又豈得爲衛生之方識者以爲知言入館爲正字兼景獻府教授俄以疾終以稱質輔以學詩學最有名於時袁燮嘗謂人曰景平佳士眞邦家之瑞子明善字叔明以父恩補將仕郎霍邱縣尉秩滿授嘉定縣丞至承議郎賜緋魚袋嗜學自修言動中矩蒞官勤恪

奉化縣志

卷二十三

人物傳一

二十九

終始不渝卒年七十三

袁甫撰墓志參王應麟撰李叔明墓志

李以制字景禮元白次子登開禧元年進士第授徽州教官率諸生改新舒文靖公祠人皆稱其有廣平遺法令新昌甫下車亟新鄉校闢講堂數橫經其間元夕罷燈市行鄉飲歌小雅三詩以相禮刊三世龜鑑書以示邑人立羣賢祠植梅子眞陶靖節像及邑之節行士十人凡涉風教事緒續講行之邑以治辦聞遷太平州通判終大理寺丞

鄭清之撰新昌政畧及宋元學案

曹孝先字元思

剡源三石人

粹中孫官承直郎任楚州錄事參軍寶慶

元年李全叛死之初全有異心孝先糾郡山陽建明屯田俾無居城中未報會全僞如海州命劉慶福脅犯閩帥孝先聞變亟趨庭諭之曰制置朝廷之制置犯制置是犯朝廷汝不欲李氏保其富貴哉其首命部曲弗敢言制使許國得泛舟楚臺以避旣而謹動

射孝先中咽孝先拔箭叱曰誤李全斬東市非汝而誰曹孝先決不求生許制使決不可殺鏃鏃交集血流披體猶登子城求許國謀焉血盡氣微而絕手蔽吭不可拆目怒瞠然許回舟中慨然曰國無以事朝廷報曹君矣亦死之全歸自海反哭而弔且斬麾下謝之事聞贈通直郎祠之賜額旌忠官其子誄時因全叛死事者又有郭德暢吳從龍

歷志參四忠節祠堂記

郭德暢字黃中嘉定元年登第官至朝散郎通判楚州寶慶二年李全陷楚德暢一家殲焉事聞旌以祠并官其子

歷志參四忠節祠堂記

吳從龍字子雲官至武功郎建康府統制紹定初李全嘯游淮瀆揚州之戰丁勝遣從龍爲先鋒而不出師從龍挺身赴賊馬仆被執使至泰州城下誘降及至呼曰我右軍統制吳從龍也馬中矢被執至此揚州無恙泰城堅宜死守賊無能爲也全寸轡之詈不

奉化縣志

卷二十三

人物傳一

三十

絕口朝廷嘉之賜廟於揚於泰賜額褒忠官其弟從虎至武經大夫溍祐間翰林應繇奏吳從龍有晉解揚漢路中大夫之節請賜諡咸溍中史館檢閱黃震乞立傳

延祐志參四忠節祠堂記

舒瀛字登甫

廣平人

寶慶二年進士任衢州西安縣尉時汪寇煽衢

瀛先眾捍敵死之朝廷嘉其忠祀先賢祠官其子模咸溍間邑令常朝宗合曹孝先郭德暢吳從龍及瀛祠之學宮稱四忠節祠

歷志

參四忠節祠堂記

林延然字本中

忠義黃賢人

天性仁孝父母卒哭踊絕復甦慕其親終

身不仕老營歸宿之地於黃賢嶺甃石穿穴旁建精舍曰萬松菴好勸化人每朔望詣黃公祠講學士大夫羣集聽講名羣英會踰年染疾月餘病革長子有大刲股食之始愈後七月復作不可藥

年七十有二

忠義志

黃應春字義甫號西軒淳祐四年登第官至朝散郎知處州從鄉先生李元白受詩學最有聲於時北游京國四方之士翕然宗之所著詩說內翰應繇左史黃自然繳進除國子錄時杜夢冠亦受詩學於元白與應春齊名夢冠字景範登寶祐四年進士第官浙

西茶鹽使歷志參  
剡源集

陳肖孫字伯巖師稷子志趣不凡登淳祐四年進士官大理寺丞鯁介清苦操筆決詞訟曲當事理賈似道為相不喜四明士獨黃震陳肖孫為咨監司士論莫易也咸淳元二間以善政事驟用由戶部郎中知嘉興府帑不妄用絕互送禮蠲逋錢二十萬米四萬子姪合食惟蔬食脫粟人呼為菜湯知府未幾兼浙西提點刑獄踰年兼度支郎官益以清廉聞人謂且大用矣會安吉寇作以措置失宜罷歸不數月疾卒年六十一澤不及子朝議惜之丞相署

奉化縣志

卷二十三

人物傳一

三十一

曰陳肖孫一廉可取遂官其子子嵩伯有傳

歷志參清容集陳處士墓志銘及忠義志

蔣文字質甫

忠義樓  
隘人

浚明六世孫幼無他弄斬然有讀書志壯試

成均不利退而自修家條理井井門多賓客燕豆從容聞一善喜溢於顏其不善面折不少借事有便於眾者任之已而勤其成年饑倡議賑恤人賴以安晚歲自放嘯詠號勝菴戒家人曰無以時事聞我卒年六十有八

陳著撰蔣質甫墓銘

王密字抑之時敘從子嘗以詞賦再貢於有司七上禮部不售晚授南廊丞不肖齷齪苟祿屢與上官爭役錢辯水利列邊防形勢欲以經濟自見言既不酬即和淵明歸去來辭棄官歸養灑然有

近古豪傑之風

戴表元題王  
氏寓菴遺稿

項榮貴

松林宅  
衛人

端平中尚榮王女臨川郡主主素工文翰通古今

時榮貴為州庠士文章甲南服余天錫薦之王奏敕為臨川郡馬

都尉主與相得時理宗遣三帥引勁兵乘滅金之威北爭河南榮貴驚謂主曰官家得隴望蜀渝盟北伐竊恐蒙古乘勝南下江淮非國家有也宣和之事足爲明戒主啟王王入奏不聽後金子才師潰趙范趙葵棄汴南走蒙古大弟忽必烈將大眾圍鄂州賈似道稱臣乞和許輸歲幣果如所料明年忽必烈卽位遣使請盟似道恐事洩命幽北使郝經於眞州榮貴知其故一日啟王王以似道欺君誤國人奏似道聞之怒奏帝逐郡主榮貴還鄉榮王除俸一年榮貴旣歸與主遊雪竇日嶺福泉白雲諸名勝以自遣主卒佯狂喪志悒悒成疾又數年伯顏入臨安榮王家屬北行強起北面哭臨三日復卧病崖山敗績謂弟榮達曰吾身爲國戚義同存亡一慟而逝年八十葬坊門鳳凰山

康熙志本謝枋得撰傳

王漢英字彥古受業樓迂齋之門文行有立登淳祐元年進士魁

奉化縣志

卷二十三

人物傳一

三十一

梧端潤朝列偉之官國子錄初約婚徐氏女以鼻病不冑嫁父母

辭婚對曰人有疾病非漢英誰適旣婚相敬如賓妻歿終身不蓄

妾子存之太學內舍

歷志

汪元春字景新

松林雙溪人

仕至知興化軍咸淳二年四月領郡纔六

旬疾歿郡人感其恩甚深甫病爲之禱甫卒爲之立廟寓公劉克

莊與名流達官及郡之人士無一不爲文以哭郡之民罷市巷哭

極至山崖海角扶老攜幼焚香誦佛以報德者曰填咽城闈亦無

不失聲大哭眾助資刻凡所哭文成二巨編曰遺愛錄其得人心

之速一時驚傳以爲異元春少穎悟好學受詩學於太學余端臣

學諭王文貫淳祐元年登進士第調上虞尉父憂去官服闋調揚

州司理參軍未行浙東提舉茶鹽司議置鹽倉定海辟元春爲監

官至則厥宇一新民不知役寶祐三年宰錢塘申免科律訟至立



斷吏不得售其奸四年擢提舉行在雜賣場時嬖倖武弁朱熠慕元春名薦以自代元春醜之不謝亦竟不往謁遂爲朱熠劾去明年通判台州適旱歉佐台守極意賑卹景定四年除武學諭遷博士五年三月輪對謂端平柄臣不知扶弱而圖驟興三京之隻輪莫歸百年之儲積頓竭是先戕國脈而國勢隨之今欲轉弱爲強惟在遴選牧守東南半壁能幾州郡憔悴之餘能幾生靈豈堪戕賊之無藝耶十月除諸王宮教授咸淳元年五月輪對謂先皇帝四十餘年憂勤僅收一戰之功遭大投艱正在今日願法藝祖以共濟艱難又援眞宗捐免捕欠乞寬民力六月除宗學博士十二月丐外差知興化軍舊例免囊山寺歲輸留以迎新例册於赤厯外取贏以自豐官買物與市異價元春至不入寺卻例册不許官買惟蔬飯一盂終日坐廳事事至卽面問而立決之其政以教爲

奉化縣志

卷二十三

人物傳一

三十三

先事有久不敢訟與訟久不得直者皆直於片言之下有挾勢侵人田者其人欲訴諸郡就歸之曰毋使公知也郡有西陂久廢僅半月而修復如舊其他有可爲久長利者次第搜舉人方欣若更生而卒之遽故千里之內羣起相哭如赤子之失慈母其門生慈谿黃震稱之曰爲相數月而薨舉四方之內哭之者古今惟一司馬公爲郡兩月而卒舉千里之內哭之者古今惟一汪公元春英爽不羣剛正而濟之以和少刻苦自立無所附麗人有片善寸長推轂恐後爲人謀委曲繾綣有情味故時譽多歸之嘗從容語震曰爲人如流水但務平平偶遇湍激爲奇爲變亦惟行其所自然

卒年五十九葬於越子性存太學生

黃震撰  
行狀

舒渚字起潛

廣平人

寶祐元年進士官奉議郎紹興府通判多惠政

陞浙東提刑獄多平反人稱其廉明仁恕云

康乾志

應文煒精史學年六十始入太學早遊江淮吳潛作相其兄淵守建康不去煒作書諷之卽謝事潛奇之招入相府不顧去史嵩之罷相其姪景卿上書或言文煒教之嵩之諷所屬掠治文煒益忿然卒得脫其言時事得失多中宋亡時尚在爲遺民年八十餘善

談乾淳諸老舊事

清容集參結  
琦亭集外編

曹說字習之孝先子痛父歿於王事刺血書華嚴法華以報恩從方外隱逸之士若爲浮屠氏之法者遊必極意之所如於浮屠書閱之連晝夜不厭察其心誠不盡溺於此蓋先薄乎在彼者不足樂而逃之也性喜著書有家法五經有解注易最久與人談皆江淮湖湘間舊事或北方遺俗無一語涉鄙俗氣其持己峻而不疏與人交恕而不污自三尺之賤童一簞之糞夫苟以誠心來風雨急難不食其諾至於非其道而卽之萬鍾之家不屑也平生絕嗜

奉化縣志

卷二十三

人物傳一

三十四

欲不娶無子不近葷血布袍紗帽以隱約自全於山林城郭間見人吃吃借書輒先請書目一閱卽能言其本末自餘一無所干於人其於世念微矣人有與之反覆於廢興存亡之際則蹙然或無所容嘗戒學子絕人我則天理自著榜其所居之齋曰泰宇鄉人尊其道以居士稱之元至元十九年卒年六十二

延祐志參  
剡源佚文

王人英

忠義茅  
嶼人

幼聰慧自翠髻時聲譽已獵獵五歲能詩八歲獻

頌寶祐四年登童子科理宗以本色官官之親擢中書檢正仍兼史館編修地位爲六十翁之冠尋出知廣德軍未幾召入轉軍器少監度宗朝爲大帥所辟贊瀛垣參越閩笑談之頃裨贊良多後

府罷歸隱

忠義志參  
本堂集

陳著字子微號本堂德剛子六歲能文爲舉子聲日起寶祐四年進士監饒州商稅景定元年任白鷺洲書院山長相國吳潛以著

才可大用薦於朝時賈似道當國諷其及門著曰甯不登朝不爲此態遂出爲安福令旋辟監三石橋酒庫及湖南帥準蕪湖茶官四年除著作郎賈似道買公田於浙西著上疏曰似道居外閫則志在欺君處端揆則務於瘠民未有將相如此而能致隆平者乞罷買公田斥逐似道庶可以救國安民似道怒出知嘉興徐經孫條其害亦致仕其所舉陳茂廉聞經孫去亦謝事歸時稱三烈咸淳三年改知嵯縣先是宗室外戚有居嵯者持一邑權前令多被譴去著至獨持風裁諸豪斂戢民賴以安在嵯四年遷通判揚州民乞留不得祖帳遮道數十里至城固嶺依依不舍因易嶺名曰陳公以識去思代者李興宗問何以教我著曰義利明而取予當教化先而獄賦後識大體而用小心愛細民而公巨室如是而已尋改臨安簽判轉通判擢太學博士十年賈似道歸越治母喪詔

### 奉化縣志

### 卷二十三

人物傳一

三十五

以天子鹵簿葬之起墳擬山陵著率諸生上疏切諫似道銜之比還朝欲遠竄著上不可後以監察御史知台州除祕書監不就宋亡隱居四明山中不與世接感慨君國時事見之詩文卒年八十

四子深沆洵泌克承家學並爲元儒學官泌有傳

歷志參本堂集及鄞縣紹興嵯

縣秀水各志

李以圭字景觀元白從子登開慶元年進士第授高郵尉寓僧廬或云此地數有光怪弗聽一日瓦礫從空而下以圭徐起見廊角土偶曰必此妖卽手劍之妖立定自此皆謂尉不畏鬼甯畏人耶任滿廨產瑞芝庭生異菊人稱爲善政所致

李譜

舒津字通叟文靖從孫讀書績學動期古人登景定三年進士第遷太學博士知平江府泣政勤敏雅志澹如弟澣字平叟清苦獨立景定元年入太學

案類彙作八年又案康乾志謂登景定三年進士任永嘉縣尉誤

講明正學

寒暑弗懈世所共嗜一皆泊然一門經學人謂得於文靖之傳成化

志參名賢錄及本堂集

舒泌字子和璘孫銑子淳祐四年進士典教象山年七十一挂冠歸老留置閫幕不就抽楹書啟迪後昆追先志飾廣平書塾帥子若孫及宗族之秀朝益暮習春秋舍菜先聖歲時朔望謁祠齒拜

冠履翼如弦誦藹如王應麟廣平書塾記參類稟附錄

王子兼字達善城南王塘人先世居青州其四世祖允迪以幹辦沿海

制置司事奉母渡江而南因家奉化祖植始字端本俊朗高岸以學行見推於鄉黨築雙清堂日與賓友樂飲賦詩其間學者稱爲雙清先生父熙字子和精毛氏詩學方允迪之南也趙侍郎粹中之先亦以其孥皆遷於明王趙既丞相家世文章子孫居明者又皆才良有時名兩家高閥閱嚴婚姻數世衣冠不衰而子兼王母

奉化縣志

卷二十三

人物傳一

三十六

沈氏大門以多藏書聞天下故子兼在齠齕之年漸漬見聞涉獵詞藝已如成人逮弱冠連試國子舉連獲之進試於禮部輒不利乃出而縱交異方名人遊吳最久客高全椒家嘗所往來者壽春魏叔高兄弟桐城方深源父子最密當是時諸公貴者以貲勢賢者以聲譽皆傾力致千里客客之欲速售者爭趨之子兼獨癯然好深湛之思所在閉簾掃閣窮日夜鈔誦如山林書生聞奇書古硯罄囊中裝致之無吝色真文忠纂文章正宗初出子兼旁搜博覽爲之注釋又作梅譜甚悉咸淳四年對策集英授迪功郎遂安縣主學時縣主學方創員以處耄年之不可以涖民者子兼至遂安以古文學教諸生諸生踰山谷裹糧相從人人以爲得良師晚有令敬其才每事諮之縣以大治郡守見令牘文詳明訝曰吾他日聞遂安令不如是何書生教之耶令以主學王公對乃郡守

遊吳時同門客也大驚卽移署幕府兼釣臺山長會守以三組鎮越子兼亦滿遂安以修職郎改授常熟縣丞未行奏辟浙東提刑司準備差遣留幕府如故始王氏卜地奉化其聚名王塘相繼名宦世習清曠子兼旣解幕府歸王塘明年火徙甯海馬隩又明年馬隩兵返依王塘燬所寒漂暑爍挾册不休化其家人亦無慍色平居未嘗以詩自名而語趣冲適格力清妥往往專名詩者不及也子兼謙和樂易殆出天性然與之居終日無敲容狎語操齊音嘗曰我家青州號義門王氏子孫不宜以爭訟聞於鄉里少善書法垂老刻意小學旣而以李斯許慎之說爲未古也諸所論議講學凡若此人聽之若汪洋無垠而要不可廢卒年七十四葬禽孝鄉靈巖村世墓之左

戴表元撰行狀參通鑑寤辨序及樓鑰王端本硯銘

張漢英仕度宗朝咸淳間守樊城爲元阿朮所圍并守其江漢英

### 奉化縣志

#### 卷二十三

人物傳一

三十七

募善泅者置蠟書髻中潛積草下浮水而出往荆鄧求援至隘口爲元兵所獲於是郢鄧之路絕又求得張順張貴二人俱智勇出眾俾爲都統又相繼爲元兵所殺至九年襄陽已被圍五年樊城亦被圍四年元將張宏範進攻流矢中其肘束創見阿朮曰襄在江南樊在江北我陸攻樊則襄出舟師來救終不可取若截江斷救兵水陸夾攻則樊必破而襄亦下矣阿朮從之遂以師截江而出銳師薄樊城漢英死焉漢英幼聘呂氏女及請期呂以雙瞽辭漢英曰聘時無恙而今喪明命也遂娶之

嘉靖志

單庚金字君範

剡源西晦溪人

父欽字崇道與朱子友善庚金少承家學

克自勉勵初以詞賦行州里間舉漕試值母喪旣就南省別試又見黜於是歸隱晦溪山中者三十年取古聖賢經傳遺言洗濯磨治家無贏餘飲水茹蔬性謙曠無利祿得喪於心客至開門清言

款接忘倦蓋眞以德義自給者卒年六十七葬嵯縣忠節鄉葛竹

山戴表元撰墓志參嵯縣志

吳化龍字伯魚咸淳十年進士度宗知其廉能授名郡嘗曰人仕雖須才亦須命運每官缺朕先懷吳化龍好嘗與化龍棋使中貴至諭其子臺眞曰金溝清泚銅池搖颺既饒佳景當復劇棋守嘉定府峻潔明斷興廉讓厲風俗鄰郡慕之三茅志

陳觀字國秀著之族弟也咸淳十年進士嘗調臨安新城縣尉入元不自矜褻接幼待賤混迹蒿翳不知其爲故官晚歲足不入城府州爭迎致率諸生以請業觀一至卽謝去徜徉巖壑侍兄著窮幽挾奇連唱屬和有帙曰棣萼集其自爲詩文曰竅蚓集嵩里集卒年八十一葬蹕駐里弟苴字楚秀能詩尤善畫梅子漢字汝朝以儒自守善畫水墨荷鷺稱於時嘗以薦授昌國學錄袁楠撰墓志參康熙

奉化縣志

卷二十三

人物傳一

三十八

志刻源志

趙與葺字君理

松林白水人

其先逃靖康亂南來與葺爲燕懿王德昭

十世孫曾祖伯璫通奉大夫祖師簡朝奉大夫知澧州兄弟凡五人俱擢進士里人號其居曰五桂堂與葺生而貧清羸秀削不類貴家子雅獨好書見奇書傾囊倒橐收買不吝惜晝夜玩味廣蓄精取爲詞章舉筆整綜有元和嘉祐之風詩騷賦尤敏瞻嘗出游吳衣冠鉛槧之士爭附之不二年以病歸輒死與葺處貧善生殖世墓在州東白水村買山及陸地開田堰水課童丁某所種禾菽某所種棗栗高卑位置俱合繩度戴表元撰墓志及遺文序

王子震字伯起連山大堰人耽學嗜古有幹濟才淳祐間以禦強寇庇鄉邑授承信參注兩浙運幹司鼎革後隱居山林自號留耕老人建留耕堂與戴表元舒岳祥趙孟頫往還吟詠至老不倦著有留

耕堂集

康乾志  
參王譜

樊伯搆字謙齋邦獲子以賢才擢直學士院咸淳末朝臣咸進遷避之策伯搆痛哭流涕以宗廟社稷不可舍去反覆陳詞其疏畧曰臣聞胡元猖獗諸大臣咸進避虜之說臣竊以爲非也夫夷狄之患何代無之誠能堅我之所可恃而不撤彼之所可忌則敵不難於自退淮東之壁尙堅閩廣之民無恙陛下宜速降明詔感激朝野戮力同心以備戰守萬一有幸卽出淮師以截其後國是猶可爲也何圖計不出此而竟以退避爲上眞臣所不解也夫退避之說不自今日始也自變故以來我朝權蠹何嘗不以退避爲善策哉而不思退一邑則失一邑避一城則失一城往自汴梁避而淮揚而河北河東關陝失矣自淮揚避而江浙而京東京西失矣臣讀先臣李綱之疏不禁痛哭而長歎者也不謂廷臣不知鑒戒

奉化縣志

卷二十三

人物傳一

三十九

而復有此議此臣所不解者一夫自汴梁失而避於淮揚淮揚失而避於臨安今又因臨安逼而避於閩廣閩廣逼將復避於何地乎此臣所不解者二況國都宗廟社稷之所在也尤非其他郡縣可比其他郡縣失郡不過一郡已耳失縣不過一縣已耳宗廟猶無恙也社稷猶未變也至國都一失則宗廟爲墟矣社稷成邱矣臣聞國君死社稷不聞其棄宗廟如之何其可避而去也卽令社稷不足惜然天下後世謂陛下爲何如主乎此臣所不解者三且陛下獨不聞建炎之故事乎當時羣臣才識不遠導上泛海比金人東向而君臣無措徘徊於道路狼狽於明州奔走於翁象之間保棲於海島之中賴張俊諸賢高橋一捷而王師稍振今復欲仍蹈故轍此臣之所不解者四夫人主者萬人之趨向也陛下卽令效死勿去尙恐不肖臣民或有攜貳之心而況鑾輿一出則守臣

解體守臣解體則百姓倉皇而鳥獸散耳夫國之所與圖存者惟此臣民耳臣民散而國其復得乎此臣之所不解者五區區之心伏願陛下明察疏留中不發乃歸宋亡杜門不出元詔訪江浙人材魏天祐以名上伯搆作書力卻之曰伯搆亡國之俘臣也前者謬廁掖垣奉職無狀退處山阿既不能保國於在朝比及國喪又不能死節於家居真天地間一罪人也然敢緩須臾之死者非偷生而希祿也蓋以罪人自處亦以廢人自棄更以老朽自恕也不謂閣下薦名上聞是何不測愚衷而刺謬之甚乎藐矣老俘遭邦不造每念及此未嘗不仰天椎心而泣血者也閣下乃以天命已去之談來相勸舉不耳之論愈足令人倍增悲悼耳蓋國家之廢興存亡固有天命而爲人臣者斷違其間殆天下之名教賴以立後世之人心藉以正脫謂天命之已去而遂反顏事主無論異曰

奉化縣志

卷二十三

人物傳一

四十

無以見我王我后於地下卽今茲亦何顏面立於大元之朝乎而況大元亦何藉有此二心之臣也昔人娶婦之諭閣下詎不聞之乎故武王不沒夷齊之義漢高不屈四皓之高良以人各有志毋相奪也今日者使俘臣得棲遲剡水優遊歲月以終天年則俘臣雖不見用於大元而大元惠及於俘臣與俘臣之受知於閣下亦已厚矣不然必欲如前書之言使伯搆委質爲臣惟有如魯仲連蹈東海以死耳閣下其奈我何哉書到敬候斧鉞至元三十年卒

年八十四有詩文十卷

剡源志